

Inuussutissarsiutiginagu aalisarneq pillugu Namminersorlutik Oqartussat nalunaarutaat

Inatsisartut inatsisaat nr. 29, 23 maj 2024-meersumi § 5, imm. 3, § 6, imm. 3, aamma § 7, imm. 1, § 68 imm. 2 aamma § 71 imm. 4 naapertorlugu

Kapitali 1

Atuuffia nassuiaatillu

Atuuffia

§ 1. Nalunaarut Kalaallit Nunaata inuussutissarsiutiginagu aalisarnikkut oqartussaaffigisaani, kiisalu tatsini kuunnilu atuutissaaq.

Nassuiaatit

§ 2. Nalunaarummi aalisarnermut inatsit tassaavoq Aalisarneq pillugu Inatsisartut inatsisaat nr. 29 23. maj 2024-meersoq.

Imm. 2. Aalisarnermut inatsimmi taaguutinut nassuiaatit nalunaarummi matumani aamma atuupput.

Kapitali 2

Inuussutissarsiutiginagu aalisarnermut peqataasinnaaneq.

§ 3. Inuit Kalaallit Nunaanni aalajangersimasumik najugaqartut Kalaallit Nunaata aalisarnikkut oqartussaaffigisaani akuersissuteqaratik inuussutissarsiutiginagu aalisarsinnaanngillat, nalunaarummi matumani immikkut aalajangiisoqarsimatinnagu.

Imm. 2. Inuit Kalaallit Nunaanni aalajangersimasunik najugaqanngitsut taamaallaat Akiliuteqarluni aallaaniarneq aalisarnerlu pillugit Namminersornerullutik Oqartussat nalunaarutaanni aalajangersakkat qaqugukkulluunniit atuuttut tunngavigalugit akiliilluni aalisarsinnaanermut Naalakkersuisunit immikkut akuerineqarlutik aalisarsinnaapput.

Imm. 3. Inuussutissarsiutiginagu aalisarnermi pisat taamaallaat nammineq atugassaapput kiisalu tuniniarneqarsinnaanatik. Akuersissuteqarluni inuussutissarsiutiginagu saarullinnik tunitsivinnut tunineqarsinnaasunik aalisarneq matumani atuutinnilaq, tak. Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaanni sukkulluunniit atuuttumi.

Kapitali 3

Inuussutissarsiutiginagu aalisarnermi teknikikkut piumasaqaatit.

Piumasaqaatit tamanut tunngasut

§ 4. Nalunaarummi matumani allamik ilanngussisoqarsimanngippat, Aalisarnerup teknikikkut iluarsartuussivigineqarnera pillugu Namminersorlutik Oqartussat nalunaarutaanni malittarisassat atuuttut kisiisa naapertorlugit inuussutissarsiutiginagu aalisartoqarsinnaavoq.

Saattuarniarneq

§ 5. Saattuarniarnermi kalunnermi ataatsimi pullatit amerlanerpaamik ataatsikkut pingasuusinnaapput.

Nipisanniarneq

§ 6. Nipisanniarnermut atatillugu amerlanerpaamik qassutit ataatsikkut marluk atorneqarsinnaapput.

Kapisilinniarneq

§ 7. Kapisilinniarneq qinnuteqarluni Naalakkersuisunit akuerineqarsimanissaq piumasaqaataavoq.
Imm. 2. Qinnuteqartunut, siorna aalisarfup ingerlanerani kapisilinniarluni aalisarnermut akuersissummik peqarsimasunut, siornaammat §-it 11 aamma 12 naapertorlugit nalunaaruteqartussaataitaanermik naammassinissimanissaq akuersissummik pissarsinissamut piumasaqaataavoq.

§ 8. Kapisilinniarluni aalisarnermi Naalakkersuisut ukiut tamaasa, nunat tamalaat akornanni isumaqatigiissutit mianeralugit, Kalaallit Nunaanni kapisilittassanik aalajangersaasassapput.
Imm. 2. Tunngaviusumik killeqarfup 3 sømilit avataanni kapisilinniarluni aalisarneq inerteqqaataavoq.

§ 9. Sumiiffinni aalisarnermut peqatigiiffiit isumasioqatigeriarlugit, kapisilinniarluni aalisarnerup ulloq aallartiffissaa Naalakkersuisut aalajangissavaat. Ulloq aallartiffissaq aamma pisassiissutinik aalajangersaaneq kiisalu taakkununga piumasaqaatit www.naalakkersuisut.gl-imi saqqummiunneqassapput tamanullu nalunaarutigineqassallutik.

Imm. 2. Imm. 1-imi ulloq taaneqartoq sioqqullugu kapisilinniarluni aalisarneq aallartinneqassanngilaq.

Imm. 3. Kapisilittassiissutit aalajangikkat tamakkernissaat qanillippat, Aalisarnermut Naalakkersuisut inuussutissarsiutinagu kapisilinniarneq qaqugu unissanersoq nalunaarutigissavaa. Aalisarnermi atortut silamik peqquteqartoqartinnagu aalisarnerup uninginnerani qaqqineqareersimassapput, imaluunniit silarlussimappat periarfissaq siulleq atorlugu qaqqineqassallutik.

Imm. 4. Imm. 3-mi ullup taaneqartup kingorna kapisilinniarneq inerteqqaataavoq.

§ 10. Kapisilinniarluni aalisarnermi uku taamaallaat atorneqarsinnaapput:

1) qarsorsat, imaluunniit

2) qassutit katitigaanermikkut annerpaamik 45-meterinik takissusillit nigartai siaarlugit minnerpaamik 140 mm-isut. Qassutit arlallit uiguleriissitat atorneqarnissaat inerteqqaataavoq.

Kapisilinnik pisarineqarsimasunik nalunaarutiginnitarneq.

§ 11. Kapisilinniarluni aalisarnermi pisarineqarsimasut tamarmik Kalaallit Nunaanni Aalisarnermut Piniarnermullu Nakkutilliisoqarfimmumut nalunaarutigineqassapput.

Imm. 2. Pisat pillugit nalunaarutiginninneq nalunaarummi ilanngussaq 1 imaluunniit Sullissivik.gl aqqutigalugu pisassaaq. Kapisilittat kapisilinnik qassutinik napittaajaanerup kingornatigut imaluunniit qissattaat atorlugu aalisareernerup kingorna tikinnermi Kalaallit Nunaanni Aalisarnermut Piniarnermullu Nakkutilliisoqarfimmumut nalunaarutigineqassapput.

§ 12. Kinaluunniit kapisilinnik aalisarnissamut akuersissutaatilik, aalisarnerlu matutinnagu kapisilinniarneq, pisussaavoq aalisarnerup matuneqarnerani tamanna nalunaarutigissallugu. tak. imm. 3.

Imm. 2. Kinaluunniit kapisilinnik aalisarnissamut akuersissutaatilik, aalisarnerlu matutinnagu kapisilinnik pisaqarsimanngitsoq, pisussaavoq aalisarnerup matuneqarnerani nalunaaruteqassalluni. tak. imm. 3.

Imm. 3. Akuersissutinik atorneqanngitsunik, imm.1 aamma pisaqanngitsoornernik, imm. 2 tak. nalunaaruteqarneq pissaq nalunaarummut ilanngussaq 1 imaluunniit Sullissivik.gl aqqutigalugu. Nalunaarsuineq Kalaallit Nunaanni Aalisarnermut Piniarnermullu Nakkutilliisoqarfimmeeriissaaq aalisarnerup matuneqarneranit ullut 14-it qaangiutsinnagit.

Kapisillit kuuanni eqqaanilu kapisilinniarneq.

§ 13. Kapisillit kuuanni kapisilinniarluni aalisarnermut pisassiissutissat aalisarnerullu ulluata aallartiffissaa Naalakkersuisut ukiut tamaasa aalajangersartarpaat.

Imm. 2. Kapisillit kuuanni kapisilinnik aalisarnermi akuersissuteqartoqartariaqarpoq, taannalu qinnuteqareernermi Aalisarnermut Naalakkersuisoqarfimmit aalisarnermut susassaqartuusumit

akuersissuteqartussamut tunniunneqartarluni.

Imm. 3. Aalisarsinnaanermut akuersissutinut qinnuteqartunut akuerineqarnissamut piunasaqaataavoq ukiup siuliani kapisilinniarnissamut akuersissuteqareersut §§ 11-imi 12-milu pisanik nalunaaruteqarnissamut piunasaqaatinut naammassinnissimassasut.

Imm. 4. Kapisillit Kuuata akuaniit 1.000 meterinit qaninnerusumut qassuserneq inerteqqutaavoq.

Imm. 5. Kapisillit Kuuata akuanit 50 meterinit qaninnerusumi aalisaatit suulluunniit atorlugit aalisarneq inerteqqutaavoq, qissattaat ataasiinnarmik qarsorsalik kisiat atorlugu aalisartoqaqqusaalluni, aammalu kuummi kiisalu tatsini tassunga atasuni taamaallaat qissattaammik aalisartoqaqqusaavoq.

Imm. 6. Naalakkersuisoqarfup aalisarnermut akisussaasup aalisarnerup qaqugu unitsinneqarnissaa pillugu tamanut nalunaaruteqarlutik ilisimatitsissapput.

Imm. 8. Aallartiffissaq sioqqullugu aalisalernissaq inerteqqutaavoq, imm. 1 naapertorlugu. Aalisarnerup unitsinnerata kingorna aalisarneq inerteqqutaavoq, imm. 7 naapertorlugu.

Saarullinniarneq

§ 14. Oqummersaq imaluunniit immoqquvik atorlugu saarullinnik aalisarneq taamaallaat ingerlanneqassaaq. Ningittakkami qarsorsat amerlanerpaamik 50-it ikkunneqarsinnaapput.

Eqalunnik aalisarneq

§ 15. Eqalunniarnermi qassutillu takissusaat tasillugit minnerpaamik 100 mm-isut nigartallit, kiisalu oqummersat, qissattaatit qalusissutillu piniutitut atorneqarsinnaapput.

Imm. 2. Qassutit eqalunniarnermi atorneqartut 30 meter sinnerlugu takissuseqassanngillat.

Imm. 3. Qassutit ningisimatillugit nakkutigineqartuassapput. Eqalunniarfik qimanneqarpat piffissaq apeqqutaatinnagu piginnittup qassutini qaqissavai.

§ 16. Eqalunniarnermi uku atorneqassanngillat:

- 1) Sanninngaariniarneq.
- 2) Ungusissutit.
- 3) Qalorsuit.
- 4) Pullatit, taamaattoq imm. 2 takuuk.

Imm. 2. Imm. 1, nr. 4-imi aalajangersagaq apeqqutaatinnagu kommunalbestyrelse kommunip pineqartup killeqarfisa iluanni eqalunniarnermi pullatit atorneqarnissaannut akuersisoqarsinnaavoq. Eqalunniarnermi pullatit atorneqarnissaannut kommune akuerseqqaassaaq. Pullatit appasinnerpaamiittup isua qutsinneq qutsinnerpaamiittullu isua qutsinneq naannerpaamik 50 meterinik ungasissuseqassapput. Pullatit kuup ikertussusaata annerpaamik pingajorarterutaa assersinnaavaat. Pullatit nigartaqqortussusaat minnerpaamik 30 mm-iussaaq.

Imm. 3. Imm. 2 naapertorlugu akuersissutinut kommunalbestyrelse erseqqinnerusunik piunasaqaasiorsinnaavoq, tassunga ilanngullugit pullatit ilusissaat, piffissaq sumiifillu atorneqarsinnaaffiat kiisalu pullasorsorluni eqalunniarniaraanni qinnuteqaateqaqqaartoqartarnissaa pillugit.

Eqalunnut qassuserneq

§ 17. Kuunni taakkualu tasinngortaanni qassusersorluni eqalunniarneq tamarmi inerteqqutaavoq.

§ 18. Tatsini eqalunniarnermi kuuit tatsimut akuaniit kuuillu aariaanniit 100 m-init qaninnerusumut qassuserneq inerteqqutaavoq.

Imm. 2. Tatsini qassusersornermi qassutit tatsip sinaaniit akimut ikertussusiata aggornerisa pingajorarterutaat sinnerlugu takissuseqassanngillat.

§ 19. Kuup akuani nalinginnaasumik ulinnerpaaffianiit kuup immallu naapiffanniit illugiinnik kuuk 150 m-init qaninnerullugu, kuup sinaa aallaavigalugu uuttorlugu, qassusersorneq inerteqqutaavoq. Ungasissusissamit tassanga ungasinnerusukkat kommunalbestyrelsit qassusersorfissap killissaanik 150 meterinit ungasinnerusumut nalunaaqutsiisimappat, nalunaaqutsikkap iluani qassusersorneq inerteqqutaavoq.

Imm. 2. Qassutit timaatungaat ulinnerani immap angusagaanut attuumasunngorlugit nivinngarneqartassapput.

Imm. 3. Qassutit imartap sineriammit sineriammut ikertussusiata pingajorarterutaa sinnerlugu takissuseqassanngillat.

Imm. 4. Qassutit narlusuumik nunamiit avamoorlugit nivinngarneqassapput.

Imm. 5. Qassutit eqalunniutit qassutinut tullernut naannerpaamik 30 meterinik akunnilerlugit nivinngarneqartassapput.

§ 20. Ujaqqanik sapusiat atorlugit eqalunniarsimagaanni eqalunniarfik qimatsinnagu saputit peerneqassapput kuuk ingerlaarfissalerlugit ammarneqassammat.

§ 21. Qassutit atorlugit eqalunniartoqarsinnaavoq taamaallaat juunip ulluisa 15-ianniit septembarip ulluisa 25-iat ilanngullugu.

§ 22. Kommunalbestyrelse kommunimi ileqqoreqqusatigut sumiiffinnik eqaloqarfusunik ataatsimik arlalinnilluunniit eqqissisimatitsisinnaavoq.

Imm. 2. Kommunalbestyrelsip sumiiffinnik eqqissisimatitsinissamut aalajangiinini nittartakkamini tamanut saqqummiuttassavai.

§ 23. Sumiiffiit § 22 imm. 1 naapertorlugu eqqissisimatitaasut nunap sananeqaataatigut ataqatigiittussaapput, taakkunanilu eqaluit kuunnit eqqissisimatitaneersut sisusimatillutik najortarunagaat toqqammavigalugu killilersorneqartassapput. Killiliinermi eqqissisitsinerup sunniutissaa annerpaaq anguniarneqassaaq, peqatigisaanillu Kalaallit Nunaanni Aalisarnermut Piniarnermullu Nakkutilliisoqarfimmit allanilluunniit nakkutiginnittussatut Naalakkersuisut toqqarsimasaannik politiinillu nakkutilliiffigiuminarnissaa anguniarneqassalluni.

Imm. 2. Kommunalbestyrelsit nalluutit qissattaatillu atorlugit eqaloqarfinni eqqissisimatitaasuni eqalunniarsinnaatitsisinnaapput, eqaloqarfiit qangaaniilli eqalunniarfigneqartarnerisa pingaarutaat pigiinarneqaqqullugu.

§ 24. Kommunalbestyrelse eqalunniarneq eqqarsaatigalugu § 15-21 naapertorlugu aalajangersakkanit sakkortunerusunik kommunip ileqqoreqqusaatigut aalajangersaasinnaavoq, pissutsit tamanna pisariaqartippassuk.

§ 25. Naalakkersuisut aalajangersakkap § 22 naapertorlugu aalajangersarneqartup ilisimatusarnissaaq siunertaralugu sanioqqunnissaanut immikkut akuersissuteqarsinnaapput.

Imm. 2. Kommuni eqaloqarfimmik kooqanngitsoq imaluunniit ataasiinnarmik kuulik, § 22 naapertorlugu aalajangersakkat sanioqqunnissaannut qinnuteqarsinnaatitaavoq, tamanna kommunip eqalunnik illersuinissaaq pillugu allatut aalajangersagaqarpat, imaluunniit kommunimi eqaloqarfimmik kooqanngitsoq uppernarsarneqarsinnaappat.

Kapitali 6 *Pineqaatissiissutit*

§ 26. Kalaallit Nunaanni Pinerluttulerinermut inatsimmi malittarisassat malillugit akiligassiisoqarsinnaavoq arsaarinnittoqarsinnaalluniluunniit:

- 1) § 3. imm. 2, 3-millu unioqquutitsisumik aalisartoqartillugu,
- 2) § 4-mut akerliusumik aalisartoqartillugu,
- 3) §§ 5-6 allassimasut malillugit atortussanut piumasaaqatit unioqqutinneqarpata,
- 4) Akuersissuteqarani aalisartoqartillugu, tak. § 7, imm. 1,
- 5) Titarnerup 3 sømilip avataani kapisilinniartoqarpat, tak. § 8 imm. 2,
- 6) § 9 naapertorlugu ulloq aalisarfissaaq nallinngitsoq aalisarneq aallartinneqarpat, tak. § 9, imm. 1, tak. § 9, imm. 2,
- 7) § 9, imm. 3 naapertorlugu aalisarnerup unitsinneqareernerani aalisarnermik ingerlatitsiinnartoqarpat, tak. § 9, imm. 4,
- 8) § 10 naapertorlugu unioqquutitsilluni atortunik atuisoqarpat,
- 9) §-it 11-12 unioqquutillugit nalunaarsuinissamik naammassinninngittoqarpat,
- 10) § 13, imm. 2 unioqquutillugu aalisarnissamut akuersissummik atuuttumik peqarani aalisartoqarpat,

- 11) § 13. imm. 4-5-mi nassuiarneqarsimasunut naapertuutinningsumik Kapisillit kuuanut qaninnerusumik aalisartoqarpat,
- 12) § 13. imm. 6 unioqqutillugu atortunik allanik atuilluni aalisartoqarpat,
- 13) § 13. imm 7-mi allassimasut saneqqullugit aalisarneq sioqqutsilluni aallartinneqarpat imaluunniit unitsinneqareersoq aalisartoqarpat,
- 14) § 14 saneqqullugu allanik aalisaateqarluni aalisartoqarpat,
- 15) § 15, imm. 1-2-mi allassimasut atortussanut piumasaqaatit unioqqutinneqarpat,
- 16) Qassutit nakkutigineqanngippata, tak. § 15, imm. 3,
- 17) § 16, imm. 1 unioqqutillugu eqalunniarnermi atortunik atuisoqarpat,
- 18) Pullatit eqalunniutit Kommunalbestyrelsip akuersissutigisimangisai eqalunniarnermi atornerqarpat takuuk § 16, imm. 2,.
- 19) §§ 17-21 imi qassusersornissamat aalajangersakkat malinnagit aalisartoqarpat imaluunniit
- 20) Nalunaarummi uani § 16, imm. 3, § 22, imm. 1, aamma § 24, naapertorlugit najoqqutassat, peqqussutit Naalackersuisut aalajangersarsimasaat piumasaqaasiorfigisimasaallu unioqqutinneqarpat.

Kapitali 7 *Atuutilersitsineq*

§ 27. Nalunaarut ulloq 1. juuni 2026 atuutilissaaq.

Namminersorlutik Oqartussat, ulloq 7. maji 2026

Peter Borg (atsior.)

Aalisarnermut, Piniarnermut, Nunalerinermut Imminullu Pilersornermut Naalackersuisoq

/Emanuel Rosing (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalackersuisut

